


欽定古今圖書集成

方輿彙編職方典



欽定古今圖書集成方輿彙編職方典

第五百六十五卷目錄

鞏昌府部藝文二

重建伏羲廟記

明姚謨

崇義書院記

前人

重修夷齊廟記

朱燮元

郡城鑿井記

胡纘宗

鞏昌新開永濟渠碑記

楊恩

鞏昌府遷學記

吉人

鞏昌府改建府治記

杜知春

鞏昌府部藝文三 詩

隴頭水

梁元帝

隴頭水二首

陳後主

隴頭水

徐陵

隴頭水二首

張正見

隴頭水二首

江總

隴頭水

顧野王

隴頭水

謝燮

被使出關

何胥

隴頭水

唐駱賓王

隴西行

王勃

隴上行

前人

隴頭水

盧照鄰

登隴

高適

經隴頭分水

岑參

隴山

前人

隴頭吟

王維

發秦州詩

杜甫

赤谷

前人

鐵堂峽

前人

鹽井

前人

寒峽

前人

青陽峽

前人

龍門鎮

前人

石龕

前人

赤谷西崦人家

前人

積草嶺

前人

泥功山

前人

鳳凰臺

前人

萬丈潭

前人

發同谷縣

前人

木皮嶺

前人

秦州二十首

前人

隴頭

羅隱

隴頭水

王建

哀隴民

皮日休

仇池石

宋蘇軾

鬼章

黃庭堅

麥積山

王仁裕

隴頭水

明高啓

秦隴道中

馬文升

秦亭

楊恩

營平里

前人

杜甫草堂

謝鏞

忠節祠

陳講

春日從安定返郡

紀元

春日... 忠... 刺...

職方典第五百六十五卷

鞏昌府部藝文二

重建伏羲廟記

明姚謨

大矣哉伏羲氏之道乎日月麗乎天百穀草木麗乎
土天地之文炳如也郁如也秩如也惟人在中經緯
以成章彌綸以參化無不彬彬然而有文與上古之
世太始初分典彝未備民物職職俗居吁吁厥文猶
隱焉自帝太昊伏羲氏出仰觀象於天俯觀法於地
中觀萬物於一身始作八卦因而重之以為六十四

古今圖書集成
天下之能事畢矣又作書契以代結繩之政以儷皮
爲禮而正婚姻之始龍馬負圖而紀百官之名斷桐
爲琴繩絲爲絃絙桑爲瑟而樂音自是興焉夫卦象
設則神明通書契作則文字著婚姻正則人倫叙百
官紀則班位修樂音陳則度數明神設其教皇建其
極物章其采民躋其行而人文於是乎著矣故曰帝
人文之始也是以孔子贊易叙聖人神化之功特始
乎帝巋然爲神農黃帝堯舜之冠及對康子問五帝
又推其德佐成上帝以合於天凡以此也今之秦州

卽古之成紀也帝實生於斯而遺廟莽莽然而在其
來遠矣顧規制儉陋風雨震凌芻牧往來而牛羊之
跡交至弗稱祀典先是巡按御史馬溥然馮時雍許
翔鳳後先建議畜聚材用荒度基址期撤而新之未
卽事而代矣嘉靖紀元之明年巡茶御史陳講聿舉
厥功登登而作巡按御史盧問之旣至懋昭祀典申
飭攸司而分攝之布程督之令嚴省試之法是用績
於成考而落焉提學副使唐龍曰祀以德舉治以化
洽是故豐后稷之祠者咸曰重本存泰伯之廟者亦

古今圖書集成
稱辨治而况維天地開闢之功啓帝王化成之理而
爲人文之始者哉惟是廟貌重新而國之大事宣焉
揭虔妥靈有宇也修祀秩禮有典也昭庸厚化有章
也諸君子於世弘矣乃於是乎特書之分守參政王
教分巡僉事周鎬姚文清成廣綜理之文州進士徐
元祉亦預其叅畫者也法皆得書時嘉靖甲申十有
二月望日

崇義書院記

前人

侍御滄州王子書紳氏當嘉靖乙未巡按西土未逾

年成鞏昌崇義書院予適至關中聞其事嘆曰美哉
曠世之典也可以訓矣先是鞏昌僻在隴右鳥鼠盤
紆渭河經緯地宏敞雄壯風氣平而人多秀乃人才
間出數十年來益不振全郡往往乏科第侍御每高
登博望曰是非山川之故而惟人之責閱其士曰惜
也未有作之耳履其學宮曰或猶隘於此乎謂宜有
白鹿洞嵩陽岳麓之規可也乃獲地於東園環以南
山清流引之淵然可宮卜兆維吉乃協謀副使鈞州
馬紀叅議劉從學僉事文安紀常命郡守肥城袁士

古今圖書集成
偉督其役郡西舊有橋壞於山水不可復取其餘材
數千章資贖金役隙民經始於是年之六月訖工於
十月越五月而事集前門三楹翼以鉅坊中爲崇義
堂五楹後爲講堂五楹廂房畢具亦各五楹最後甃
以浮橋橋後爲尊經閣兩夾室各三楹左右各爲號
房三連凡八楹侍御乃遴選臨鞏甘肅凡河西之才
而秀者百數十人群聚其中禮聘明儒師之復資以
廩穀之費時掌科全椒戚君賢以事會侍御史至鞏
昌適工將成相謂伏羲實生其地題曰崇義書院因

僉事信陽樊鵬請文以記予曰教化之於人深矣古
者鄉有庠黨有序閭里有塾稚子咸能歌咏教至備
也教化行而風俗美賢才濟濟乎其衆多其在外郡
者猶其在王國也夫臨鞏古雍州疆域非不可以比
勝於豐鎬然而人才之寥落如此何也教化弛而有
司因循之過也且其地孰與於蜀昔蜀偏安不文乃
後文翁爲之教相如爲之師遂爲名地况此爲伏羲
孕靈毓秀之所人顧視之若偏陬下邑然豈天之降
才爾殊乎夫世之言五經者必首於易言易者必首

古今圖書集成
於伏羲伏羲者乃萬世文字之祖道統淵源之所自出也諸士生斯地尊其人重其道默而得之將不有勃然而興起如陳圖南邵康節之獨究先天之學者乎不然則潛心於羣聖人之經出而取科第爲明時用樹勲績於當時流英聲於宇內爲山川吐色躋之於豐鎬之盛者也是則侍御拳拳作興之意將以收他日聚徒養士之效者也侍御按河西風采凜然方日以澄清所部爲事而用其暇畱意人才如此其有關風化甚大顧安其故不卽乎新以有所鼓舞於上

則不可而諸士不能相感以淬礪奮發於下則將如之何諸生起而謝曰此則二三子之咎也請用以爲規

重修夷齊廟記

朱燮元

隴西之有首陽縣也其名最古而縣實以山得名漢唐以後日尋於干戈割裂分併迄無寧宇於是縣廢而山靈亦遂以湮沒余過熙湟飯於中火見所謂首陽城者雉堞具在詢之父老共曰進此五十里則有二賢祠兩所一爲舊址一爲後勑因覽其形勝嗟我

古今圖書集成
峭聳羣峯並峙俗以爲西五臺稱清涼世界蓋自崑
崙積石蜿蜒東入至此實分兩界而祖四瀆其稱首
陽的有繇也二賢擇地而蹈真無踰此郡人楊司農
閱覽博物君子也著首陽辯灑灑數百言足破千古
之繆會鞏郡宋二守力請修復余遂量捐廩羨行令
糾工而朱郡守併兩別駕魏司理方縣令咸不吝捐
貲相與協贊靖遠道方伯秦公臨鞏道大叅周公洮
岷道大叅畢公分巡道僉憲宋公一聞義舉復共捐
助會直指牟公來按兩河遂上其事蒙報可於是經

費充然工遂落成凡爲正殿三楹中肖二像二門併
前門亦三楹傍列耳房外爲綽楔舊有香火田二畝
日久爲豪右所據今悉清出名道士常本炫邵本源
守之仍蠲其賦歲時則入祀典是役也卽不及蒲坂
之輝煌然亦足以存真跡發幽光矣工成當有一言
記其事余不敏竊惟昔儒謂堯舜其心至今在者非
其心在以仲尼之道在也仲尼羹牆千古仰接危微
原自有一種真脉獨往獨來不與劫數同盡卽傳家
放殺尚開舌端煌煌制作百世可知而獨以不從周

故埋沒二賢孜孜稱慕不少概置者則惟二賢之一
恥所關者大而相契者真耳夫恥之爲義振頹飭靡
蕩穢驅妖抗造化溢出之威靈留人世不磨之公道
天地有成毀此脉無盛衰堯舜讓二賢求仲尼憤皆
此心也故天民之外另標逸民一局而慨然以身接
之誠謂等民耳乘運則稱天違時則稱逸兩者迭負
互用若合若離而要於究竟寧無彼不可無此譬之
水然五色弗章也謂五色非水不可而水若無五色
逾見其真面目矣孟子曰不由者直痛所處險峻不

願由耳而皆不爲者何物學仲尼者何事試以正名
當避位東周當扣馬絕糧當採薇仲尼之與二賢豈
非千古真相知哉今人人心中皆有仲尼而就仲尼
所謂行己近勇者猛然一醒卽揭出二賢真相矣迂
者不曉輒曰吾儕生長休明黼藻鴻業何必哆口譚
窮餓隱僻之事獨不思學仲尼何嘗刪定筆削亦何
嘗栖栖天下善師者師其心耳苟清夜自捫執熱而
不願涼乎履穢而不思潔乎栩栩南柯而不醒乎勞
勞蝸角而不厭乎提此一念卽見二賢善學二賢正

所以善學仲尼也有異術哉

郡城鑿井記

胡纘宗

隴西土厚水深郡城地傾民不克井吾不知其幾千年矣自創郡引渭水荆水入城而注之池民朝夕取給焉吾不知其幾百年矣然源不遠故流不大而旱必涸澇必溢寒必冰則無水地且邊民且貧羌氏深入豺虎竊發河不可引池不及涸則無水民日病之而不能顧也往歲侍御霍丘胡君欲水入城不慳而入池不竭也嘗築堤以障渭以約荆然猶夫故流也

今歲之春侍御張君鵬按隴以西於民利病孳孳焉於民病苦兢兢焉既至郡乃詢及井郡中士以其故告公公喟然曰民何取於河耶何取於池耶民舍河與池何以生耶乃咨之分守劉君少叅從學分巡紀君僉憲常諏之父老曰是地也嘗鑿井汲水矣嘗鑿井不及水遂輟不鑿矣無怪其不能井也夫水行地中猶氣行天地中無時無之無處無之然亦有脈絡焉故水行之也有巨細有淺深未有鑿不得水者未有鑿此不得而鑿彼復不得者蓋求善鑿者察地之

脉鑿之當得水矣乃命指揮使閻清氏督其功然不以煩民卽數罪人之法當贖力能贖者令人鑿一井而人效力焉清乃先於其司儀門前之右選工鑿之十數仞果得水甘而冽汲之泠泠然取之淵淵然然昔難而今易昔嗇而今豐此非其數哉此非其時哉明日清復於公公曰我固知必得水也由是盡城中將分鑿之計得井十有五將次第皆得水也初鑿井而得水郡中無大小賢不肖無不欣欣然以得井爲賀者曰而今而後吾郡得安飲也旣汲井而得飲郡

內外無遠近賢不肖無不欣欣然以得井爲樂者曰而今而後吾乃得安食也蓋不復以涸以溢以冰爲病矣是可賀不復以羌氏以豺虎爲警矣是可樂旣訖工閻乃謀諸大夫士謀諸父老曰引水以飲其利小鑿井以飲其利大引水以瀆其力勤鑿井以汲其力暇引水以生其澤近鑿井以生其澤遠夫何可無記以示永久纘乃樂道之而爲之記然民之感之吾不知其幾千百年也夫何俟於記

鞏昌新開末濟渠碑記

楊恩

古今圖書集成
隴西在輿地西南崑崙之麓圖稱土厚水深鞏當上游土厚則鮮泉水深故難井自有郡以來惟引西南河水由乾坤兩隅入城匯爲數池郡民取給顧二河激水耳源近流微雨輒泛波嚙郭旱卽烈日乾沙杯池星竈民輒苦之從古然矣其大者地鄰羌氏竊發不時如一旦有意外之警水不及引池不及瀦可立而槁異時海氛南牧烽火達於近郊民若釜魚群沸以憂守者守道洛陽楊公歸儒計無所出至欲割北郭餌敵幸其飽去民滋用譁幾成激變獨以無水故

耳時過事去卽若幕燕然豈獨其計畫無復用之所爲民慮者未至也天不棄西人畀我副憲岳公分守隴右始至郡卽講求民瘼之急者咸以慳水首對公駭之或云城西二十里南山谷中荆水出焉俗名科羊河北流入渭源遠流長水旱如一引而入城其利長遠先是亦常議及之類以勞費中輟今其故跡猶有可尋者是在上耳公慨然曰茲係於民生利害何如者吾尚可以勞費爲解卽借郡伯劉公隴西令張君星駕往視相原度隰往返數四喜曰吾得之矣是

古今圖書集成
誠可引第絕流而隄與水爭利不能分山而渠與民
讎力不可前舉不終無惑也今惟循南麓而導隄捍
其外勢便工省爲費亦廉漲則大勢入渭渠不與聞
歉則全河可引水不患乏城中益廣陂池常注令滿
繚垣樹門以備緩急復何不給之患又資二十里灌
漑之利是烏可不急舉指畫既定自出俸若干餘金
付令君庀材鳩工任其事郡公雅與公同志時時省
督勸課經於乙巳六月越三月而渠成導入水城洋
洋安流源源常繼民皆手額呼祝歡聲載道矣是役

也流井而行旣恆旣盈渟渟泓泓民用樂生利一餘
流注隍四周泱泱消彼陸梁壯我金湯利二利用播
植時萬時億以溝以洫蕃我黍稷利三其小者無論
也今君以自古艱虞一旦永賴公德之及民者匪細
不可無言以紀其事過余徵文余郡人也目擊其盛
鼓舞慶幸尤倍羣情故採輿人之頌書之若此後有
仁人覩碑而紹烈焉雖萬世可也因以告夫來者公
諱萬階朝城人癸未進士

鞏昌府遷學記

吉人

南安學宮之徙於萬壽寺也自萬曆之初年前少叅劉君始彼謂是梵宇也敞而邃可廓仄陋而美觀瞻乃岑樓之峙其右郡獄之掩其前未遑顧也四十年來人文蕭瑟間有离奧渫而通籍者率不竟其閎鉅士靡所歸咎曰曩徙之者弗善也是宜改郡之仕紳與博士弟子員鳴之前學使徐公韙其議儲鍰於帑儲糈於廩以待舉事歲癸丑之春予奉命按視兩河入關踰隴而至南安諸士復理前語予謀之守隴右憲副周君周君曰曩汧陽道上心戴徐使君之言矣

顧固可更而樓難移茲事體大卽更矣移矣而不得脉得向亦難非遇精形家言者効卜瀍食洛之規以定之脫一弗當後之視今不猶今之視昔也歟哉已聞西安有曾元卿者治茲術奇中檄徵以至周遭踰覽者數日而定是基曰茲地也前樺林而負高台左筆峯而右仁壽岷漳之水從西南來者襟帶以入於渭巖石壁屹砥於東瀾足稱奧區且爲四十年以前之舊基易兌爲離豈山川靈秀有待而闢耶議定報可乃以歲之七月鳩工庀材卜吉而遷旣以孟冬西

巡還謁廟登堂進諸士講業堂構將成及甲寅春歷
天水河池載歷南安則見崇卑就列向背因形棖題
約制輪奐飾觀聖靈既妥人文攸萃予諗之周君曰
若何其費不煩公役不勞民規制弘而工成速也周
君曰某安能亦惟是先師之寵靈寔式憑之且諸公
提衡於其上郡邑紳弁衿綏共襄於其下身董治之
責者不憚征繕不間風雨閔閔焉如農之望歲朝夕
冀其成故不甚淹時日也某安能抑聞之春秋之法
舉非常事則必書茲事安敢謂非常然可謂常事不

書哉敢斲金石之文以示來茲并所以訓飭多士者
予惟泮之成史克書之予橐筆柱下史也例應記且
訓飭予事也烏能已於言

鞏昌府改建府治記

杜知春

國家建置府治郡大夫蒞之用宣皇猷澤生民且垂
諸邑具瞻係非渺小也府故建城西南隅國初兵戈
甫定但襲元陋雖少葺理終未安妥守者間亦有改
遷志竟以工費浩煩憚難而止萬曆甲戌永寧胡公
摠奉命守鞏公治官若家愛民若子一觀府治輒嘆

古今圖書集成
日鞏古南安郡提封蓋千里廣遠矣茲治僻且隘政
教奚以敷於時率寅佐謀之鄉之士夫父老曰建置
所以辨方定位昭等威興廢圯非得已也若府治負
離面坎非地也側衛揖縣非體也矧歲久材朽瓦石
隳裂改建烏容可後諸寅佐大夫父老僉曰善公卽
躬裁圖式度諸所費貲羽白撫按報可遂視郡舊址
易其向擴府南民居十餘家計地償以公帑金口優
其半民歡從乃矢吉檢有司省試程物鳩工辦財垣
其四周其最中東面晴嵐乃立明治堂凡五楹昂踰

數尋廣闊稱之堂兩掖爲左右庫左庫北三楹曰經
歷司右庫南三楹曰照磨所司所皆東面堂簷前覆
大厦厦外爲露臺臺有左右中三階行五十步許有
月臺焉上建戒石小坊月臺階去儀門稍近矣左階
白露臺北旁下直達左角門階北吏廊十二楹南其
面右階白露臺南旁下直達右角門階南吏廊十二
楹北其面儀門三楹儀門左右爲角門角門外北有
禮神祠寅賓亭南有工匠所刷印房大門三楹旌善
亭在郡門左申明亭在郡門右州亭在旌善北縣亭

在申明南州縣亭南北又有榜房制皆面東大門外
建師帥坊對坊有看牆又豎二坊於各榜房之末曰
承流宣化堂後左廂三楹右廂三楹其上五楹思政
堂也過思政曰宅門門內左右記室前爲中宅後爲
寢室旁爲庫廚諸房記楹蓋四十有奇寢後曰官園
園西面東三楹曰衙神廟井亭左於廟池亭右於廟
園園而外居者吏人廨也思政北有門門外爲夾道
由北折而東行其一爲清軍廳監小坊一楹南面若
於大堂拱焉入其坊門堂亦東面堂三楹左右卷房

六楹中宅一區三面各三楹宅旁有廂房寢後有廚
舍其一爲理刑廳若坊若門若堂舍大都如清軍廳
制理刑廳以東而面南有鑾駕軍器二庫道皆由北
而徂儀門思政南有門門外爲夾道由南折而東行
其一爲督糧廳若坊若門若堂舍大都亦如清軍廳
制廳以東而面北有經歷官照磨官二衙其庭寢門
舍俱備道皆由南而徂儀門夫郡治更新自門堂寢
宅歷諸庭祠庫藏崇階峻臺偉楹采棟秩秩翼翼炳
然煥然望之軒廓履之洞豁美哉居乎信足以聳觀

瞻沛政教矣工始丙子春三月不踰期而落成予竊聞周禮役法不竭國用不盡民力茲改建請公帑僅若干金捐俸金者倍之力役則取諸郡中及州縣隙民月惟一旬償其勞往守率以工費浩煩憚難獨公毅然爲之以俸不以官帑節愛不疲民力卒能建無前偉績謂公爲人所不敢爲行人所不能行者非歟工幾成公會以覲入尋以治最擢陝西按察司副使兵備延綏矣鞏人士覲府治如名之甘棠悠然有深思焉今年春二府楊公過余曰府治幸賴胡公改遷

今且訖役顧享其佚者思其勞願記諸石以識不忘予不獲避席終辭而承命焉竊念是役也與經始者前二府太原李公應春四府東平張公孔業緒遺功者三府光山劉公輔四府中江楊公啓元訖役底績者則今請記之蒲坂楊公躍川是也法得並書之其他董役與勞諸執事咸載碑陰

鞏昌府部藝文三

詩

隴頭水

梁元帝

銜悲別隴頭關路漫悠悠故人迷遠近征人分去留
沙飛晚成幕海氣夜如樓欲識秦川處隴水向東流

隴頭水二首

陳後主

塞外飛征蓬隴頭流水鳴漠處揚沙暗波中燥葉輕
地風冰易厚寒深溜轉清登山一回顧幽咽動邊情

二

高隴多悲風寒聲起夜藁禽飛暗識路鳥轉逐征蓬

落葉時驚沫移沙屢擁空回頭不見望流水玉門東
隴頭水 徐陵

別塗聳千仞離川懸百丈攢荆夏不通積雪冬難上
枝交隴底暗石礙波前響迴首咸陽中難言夢時往

隴頭水二首

張正見

隴頭鳴四注征人逐貳師羌笛含流咽胡笳襍水悲
湍高飛轉駛澗淺蕩還遲前旌去不見上路杳無期

二

隴頭流水急流急行難渡遠入隗囂營傍侵酒泉路

心交賜寶刀小婦成紈綺欲知別家久戎衣今已故

隴頭水二首

江總

隴頭萬里外天涯四面絕人將蓬共轉水與啼俱咽
驚湍自湧沸古樹多摧折傳聞博望侯苦辛提漢節

二

霧暗山中日風驚隴上秋徒傷幽咽響不見東西流
無期從此別更度幾年幽遙聞玉關道望入杳悠悠

隴頭水

顧野王

隴底望秦川迢遞隔風煙蕭條落野樹幽咽響流泉

瀚海波難息交河冰未堅寧知蓋山水逐節赴危絃

隴頭水

謝燮

隴阪望咸陽征人慘思腸咽流喧斷岸遊沫聚飛梁
鳧分斂冰彩虹飲照旗光試聽饒歌曲唯吟君馬黃

被使出關

何胥

出關登隴阪迴首望秦川絳水通西晉機橋指北燕
奔流下激石古木上參天鶯啼落春後鴈度在秋前
平生屢此別腸斷自催年

隴頭水

唐駱賓王

隴阪高無極征人一望鄉關河別去水沙塞斷歸腸
馬繫千年樹旌懸九月霜從來共嗚咽皆是為勤王

隴西行

王勃

隴西多名家子弟復豪華千金買駿馬蹀躞長安斜
彫弓侍羽林寶劍照期門南來射猛虎西去獵平原
旣夕罷朝參薄暮入終南田間遭罵詈低語示乘驂
入被鑿輿寵出視轅門勇無勞豪吏猜常侍當無恐
充國出上邽李廣出天水門第倚崆峒家世垂金紫
麟閣圖良將六郡名居上天子重開邊龍雲壘相向

烽火照臨洮榆塞馬蕭蕭先鋒秦子弟大將霍嫫姚
開壁左賢敗夾戰樓蘭潰獻捷上明光揚鞭歌入塞
更欲奏屯田不必勒燕然古人薄軍旅千載謹邊關
少婦經年別開簾知禮客門戶爾能持歸來笑投策

隴上行

前人

負羽到邊州鳴笳度隴頭雲黃知塞近草白見邊秋

隴頭水

盧照鄰

隴山飛落葉隴鴈度寒天愁見三秋水分爲兩地泉
西流入羌郡東下向秦川征客重回首肝腸空自憐

登隴

高適

隴頭遠行客隴上分流水流水無盡期行人去未已
淺才登一命孤劍適萬里豈不思故鄉從來感知已

經隴頭分水

岑參

隴水何年有潺潺逼路旁東西流不歇會斷幾人腸

隴山

前人

西向輪臺萬里餘也知鄉信日應疎隴山鸚鵡能言
語爲報家人數寄書

隴頭吟

王維

古今圖書集成
長安少年遊俠客夜上戍樓看太白隴頭明月迴臨
關隴上行人夜吹笛關西老將不勝愁駐馬聽之雙
淚流身經大小百餘戰麾下偏裨萬戶侯蘇武纔爲
典屬國節旄空盡海西頭

發秦州詩

杜甫

乾元二年冬自秦州如同谷至成都紀行所作
我衰更懶拙生事不自謀無食問樂土無衣思南州
漢源十月交天氣涼如秋草木未黃落况聞山水幽
栗亭名更嘉下有良田疇充腸多薯蕷崖蜜亦易求

密竹復冬笋清池可方舟雖傷旅寓遠庶遂平生遊
此邦俯要衝實恐人事稠應接非本性登臨未銷憂
谿谷無異石塞田始微收豈復慰老夫惘然難久畱
日色隱孤戍烏啼滿城頭中宵驅車去飲馬寒塘流
磊落星月高蒼茫雲霧浮大哉乾坤內吾道長悠悠
赤谷
前人

天寒霜雪繁遊子有所之豈但歲月暮重來未有期
晨發赤谷亭險艱方自茲亂石無改轍我車已載脂
山深苦多風落日童穉饑悄然村墟迴煙火何由追

貧病轉零落故鄉不可思常恐死道路永為高人嗤

鐵堂峽

前人

山風吹遊子縹緲乘險絕峽形藏堂隍壁色立積鐵
徑摩穹蒼蟠石與厚地裂脩織無限竹嵌空太始雪
威遲哀壑底徒旅慘不悅水寒長冰橫我馬骨正折
生涯抵弧矢盜賊殊未滅飄蓬踰三年回首肝肺熱

鹽井

前人

鹵中草木白青者官鹽煙官作既有程煮鹽煙在川
汲井歲楫楫出車日連連自公斗三百轉致斛六千

君子慎止足小人苦喧闐我何良嘆嗟物理固自然

寒峽

前人

行邁日悄悄山谷勢多端雲門轉絕岸積阻霾天寒
寒峽不可度我實衣裳單况當仲冬交沂沿增波瀾
野人尋煙語行子傍水餐此生免荷及未敢辭路難

青陽峽

前人

塞外苦厭山南行道彌惡岡巒相經互雲水氣參錯
林迴峽角來天窄壁面削磈西五里石奮怒向我落
仰看日車側俯恐坤軸弱魑魅嘯有風霜霰浩漠漠

古今圖書集成
昨憶踰隴阪高秋視吳嶽東笑蓮花卑北知崆峒薄
超然侔壯觀已謂隱寥廓突兀猶趁人及茲嘆冥寞

龍門鎮

前人

細泉兼輕冰沮洳棧道濕不辭辛苦行迫此短景急
石門雪雲隘古鎮峰巒集旌竿暮慘澹風水白刃澀
胡馬屯成臯防虞此何及嗟爾遠戍人山寒夜中泣

石龕

前人

熊羆咆我東虎豹號我西我後鬼長嘯我前狻又啼
天寒昏無日山遠道路迷驅車石龕下仲冬見虹蜺

伐竹者誰子悲歌上雲梯爲官采美箭五歲供梁齊
苦云直簞盡無以充提攜奈何漁陽騎颯颯驚烝黎

赤谷西崦人家

前人

躋險不自安出郊已清日溪迴日氣暖逕轉山田熟
鳥雀依茅茨藩籬帶松菊如行五陵暮欲問桃源宿

積草嶺

前人

連峰積長陰白日遮隱見颼颼林響交慘慘石狀變
山分積草嶺路異明水縣旅泊吾道窮衰年歲時倦
卜居尚百里休駕投諸彥邑有佳主人情如已會面

來書語絕妙遠客驚深眷食蕨不願餘茅茨眼中見
泥功山 前人

朝行青泥上暮在青泥中泥濘非一時版築勞人功
不畏道途永反將汨沒同白馬為鐵驪小兒成老翁
哀猿透却墜死鹿力所窮寄語北來人後來莫怱怱

鳳凰臺

前人

亭亭鳳凰臺北對西康州西伯今寂寞鳳聲亦悠悠
山峻路絕蹤石林氣高浮安得萬丈梯為君上上頭
恐有無母雛饑寒日啾啾我能剖心血飲啄慰孤愁

心以當竹實炯然忘外求血以當醴泉豈徒比清流
所重王者瑞敢辭微命休坐看彩翮長舉意八極周
自天銜瑞圖飛下十二樓圖以奉至尊鳳以垂鴻猷
再光中興業一洗蒼生憂深衷正為此羣盜何淹畱

萬丈潭

前人

清谿合冥漠神物有顯晦龍依積水蟠窟壓萬丈內
跼步凌垠堦側身下煙靄前臨洪濤寬却立蒼石大
山危一徑盡岸絕兩壁對削成根虛無倒影垂澹賴
黑知灣濶底清見光炯碎孤雲倒來深飛鳥不在外

古今圖書集成
高蘿成帷幄寒木疊旌旆遠川曲通流嵌竇潛洩瀨
造幽無人境發興自我輩告歸遺恨多將老斯遊最
閉藏脩鱗蟄出入巨石礙何當暑天過快意風雨會

發同谷縣

前人

賢有不黔突聖有不暖席况我饑愚人焉能尚安宅
始來茲山中休駕喜地僻奈何迫物累一歲四行役
忡忡去絕境杳杳更遠適停驂龍潭雲回首虎崖石
臨岐別數子握手淚再滴交情無舊深窮老多慘感
平生懶拙意偶植棲遁迹去住與願違仰慙林間翮

木皮嶺

前人

首路栗亭西尚想鳳凰村季冬攜童稚辛苦赴蜀門
南登木皮嶺艱險不易論汗流被我體祁寒爲之暄
遠岫爭輔佐千巖自崩奔始知五嶽外別有他山尊
仰干塞大明俯入裂厚坤再聞虎豹鬪屢跼風水昏
高有廢閣道摧折如短轅下有冬青林石上走長根
西崖特秀發煥若靈芝繁潤聚金碧氣清無沙土痕
憶觀崑崙圖日擊元圃存對此欲何適默傷垂老魂

秦州雜詩二十首

前人

滿目悲生事因人作遠遊遲迴度隴怯浩蕩及關愁
水落魚龍夜山空鳥鼠秋西征問烽火心折此淹留

二

秦州城北寺傳是隗囂宮苔蘚山門古丹青野殿空
月明垂葉露雲逐渡溪風清渭無情極愁時獨向東

三

州圖領同谷驛道出流沙降虜兼千帳居人有萬家
馬驕朱汗落胡舞白蹄斜年少臨洮子西來亦自誇

四

鼓角緣邊郡川原欲夜時秋聽殷地發風散入雲悲
抱葉寒蟬靜歸山獨鳥遲萬方聲一槩吾道竟何之

五

南使宜天馬由來萬匹強浮雲連陣沒秋草徧山長
聞說真龍種仍殘老驢驢哀鳴思戰鬪迴立向蒼蒼

六

城上胡笳奏山邊漢節歸防河赴滄海奉詔發金微
士苦形骸黑林疎鳥獸稀那堪往來戍恨解鄴城圍

七

莽莽萬重山孤城山谷間無風雲出塞不夜月臨關
屬國歸何晚樓蘭斬未還煙塵一長望衰颯正摧顏

八

聞道尋源使從天此路迴牽牛去幾許宛馬至今來
一望幽燕隔何時郡國開東征健兒盡羌笛暮吹哀

九

今日明人眼臨池好驛亭叢篁低地碧高柳半天青
稠疊多幽事喧呼閱使星老夫如有此不異在郊坰

十

雲氣接崑崙泔泔塞雨繁羌童看渭水使客向河源
煙火軍中幕牛羊嶺上村所居秋草淨正閉小蓬門

十一

蕭蕭古塞冷漠漠秋雲低黃鵠翅垂雨蒼鷹饑啄泥
薊門誰自北漢將獨征西不意書生耳臨衰厭鼓鼙

十二

山頭南郭寺水號北流泉老樹空庭得清渠一邑傳
秋花危石底晚景臥鐘邊俯仰悲身世溪風爲颯然

十三

古今圖書集成
傳道東柯谷深藏數十家對門藤葢瓦映竹水穿沙
瘦地翻宜粟陽坡可種瓜船人近相報但恐失桃花

十四

萬古仇池穴潛通小有天神魚人不見福地語真傳
近接西南境長懷十九泉何時一茅屋送老白雲邊

十五

未暇泛滄海悠悠兵馬間塞門風落木客舍雨連山
阮籍行多興龐公隱不還東柯遂疎懶休鑷鬢毛斑

十六

東柯好巖谷不與衆峯群落日邀雙鳥晴天卷片雲
野人矜險絕水竹會平分采藥吾將老兒童未遣聞

十七

邊秋陰易夕不復辨晨光簷雨亂淋幔山雲低度牆
鷓鴣窺淺井蚯蚓上深堂車馬何蕭索門前百草長

十八

地僻秋將盡山高客未歸塞雲多斷續邊日少光輝
警急烽常報傳聲檄屢飛西戎外甥國何得近天威

十九

古今圖書集成
鳳林戈未息魚海路常難候火雲峰峻懸軍幕井乾
風連西極動月過北庭寒故老思飛將何時議築壇

二十

唐堯真自聖野老復何知曬藥能無婦應門亦有兒
藏書聞禹穴讀記憶仇池爲報鷓鴣行舊鷓鴣在一枝

隴頭

羅隱

借問隴頭水年年恨何事全疑嗚咽聲中有征人淚
自古無長策况我非深智何計謝潺湲一宵空不寐

隴頭水

王建

隴水何年隴頭別不在山中亦嗚咽征人塞耳馬不
行未到隴頭聞水聲謂是西流入蒲海還聞北去繞
龍城隴東隴西多屈曲野麋飲水長簇簇收兵夜回
水傍住憶著來時磨劍處向前無井復無泉放馬回
看隴頭村

哀隴民

皮日休

隴山千萬仞鸚鵡巢其巔窮危又極險其山猶不全
蚩蚩隴之民懸度如登天空中覘其巢驚擾爭紛然
百禽不得一十人九死焉隴川有戍卒戍卒亦不閒

古今圖書集成
將命提雕籠直到金臺前彼毛不自珍彼舌不自言
胡爲輕人命奉此玩好端吾聞古聖王珍禽皆捨旃
今在隴民屬每歲啼漣漣

仇池石

宋蘇軾

海石來珠宮秀色如娥綠陂陀尺寸間宛轉陵巒足
連娟二華頂空洞三茅腹初疑仇池化又恐瀛洲蹙
熬懃嶠南使餽餉揚州牧得之喜無寐與汝交不瀆
盛以高麗盆藉以文登玉幽光先五夜冷氣壓三伏
老人生如寄茆舍久未卜一夫幸可致千里常相逐

風流貴公子竄謫武當谷見山應已厭何事奪所欲
欲畱嗟趙弱寧許負秦曲傳觀慎勿許問道歸更速

鬼章

黃庭堅

千仞溪中石轉雷漢家萬騎擣虛回定知獻馬番雛
入看卽稱觴都護來

麥積山

王仁裕

躡盡懸崖萬仞梯等閒身與白雲齊簷前下顧群峯
小掌上平分落日低

隴頭水

明高啓

古今圖書集成
人間何處無流水偏到隴頭愁入耳夜雜羌歌明月
中秋驚漢夢空山裏隴阪崎嶇九迴折聲隨到處長
嗚咽欲照愁顏畏水渾前軍曾洗金瘡血回頭千里
是長安征人淚枯流不乾

秦隴道中

馬文升

問俗昔曾過隴山西征今復出秦關鴈聲叫日迷寒
渚楓葉經霜帶醉顏世路羊腸千里曲功名蝸角幾
人閒林間鸚鵡能言語笑我年來兩鬢斑

秦亭

楊恩

大隴西來萬嶺橫秦亭何處但荒荆汧西考牧方分
土隴右山川盡姓羸問俗依然存氣節餘風猶自事
刀兵要知嬖倖能傾國軹道降王見子嬰

營平里

前人

邊事年來日漸非營平故里一沾衣忽聞廊廟盈廷
議却憶將軍振旅歸北闕浮雲迷望眼西山烽火接
郊畿何人再執屯田奏見說三軍正苦饑

杜甫草堂

謝鏞

當年鼙鼓動漁陽此地先生避亂唐最愛東柯深谷

古今圖書集成
好翻憐禹穴隱書藏空餘流水青峯秀獨弔遺蹤白
草長詩句至今吟險絕片雲隻鳥總茫茫

忠節祠

陳講

十二連城宿霧黃一門全節總堪傷指天力灑金戈
血唾地寧迴鐵石腸自分赤心終報主非緣青史欲
傳芳一杯椒酒忠魂在千仞豐碑照夕陽

春日從安定返郡

紀元

三十六迴廣武道往來八百敢辭艱嘶風馬識通安
驛殘月人歸雙峪山板屋落花飛片片荒村曲澗水

潺潺隴頭不是勾畱地何事七年尚未還

欽定古今圖書集成方輿彙編職方典

第五百六十六卷目錄

鞏昌府部紀事

鞏昌府部雜錄

鞏昌府部外編

Blank page with vertical lines for text.

職方典第五百六十六卷

鞏昌府部紀事

通志周厲王三十六年西戎反

宣王元年命秦莊公伐西戎克之封西隣大夫莊公秦仲之子先是犬戎殺秦仲至是復讎克之復仲後及其大駱犬丘地封大夫

襄王二十八年八月秦穆公西伐得戎人田余闢地千里遂霸西戎戎皆踰小隴西徙遂有邽西地開天水郡至武公勤王有功周東遷盡予陝西地始與會

盟

莊王二年丙戌興龍峽渭水赤三日凡八里

十四年冬十月秦武公伐邽戎冀戎傾其巢置冀城

豸道二砦後改爲縣卽今伏羌寧遠

秦始皇二十七年巡隴西北地過回中登鷄頭山而

還使長子扶蘇監蒙恬軍扶蘇好強諫始皇欲遠之

故畱監恬軍

始皇二十三年命將軍蒙恬伐休屠卻七百里收河

南地築長城起臨洮經渭州俱鞏之北地

漢書高祖本紀二年冬十一月漢王還歸都櫟陽使

諸將略地拔隴西繕治河上塞故秦苑園囿池令民

得田之

通志文帝十五年丙子黃龍見於成紀

武帝六年帝西巡踰隴至崆峒山臨沮厲河而還行

在猝至從官不得食守者自殺丞尉而下死者數十

人隴人大駭

宣帝神爵元年春三月先零羌楊玉叛遣將軍趙充

國擊之七月降上屯田十二奏論功封營平侯

五年先零羌叛天水隴西復反校尉溫序死之
成帝鴻嘉三年癸卯冀南山石鼓自鳴聲隆隆如雷
野鷄皆鳴

光武帝建武十年冬十月來歙等攻破落門隗純降
王元奔蜀隴右悉平

十一年夏用來歙奏拜馬援爲隴西郡太守

十二年九月參狼諸羌寇武都隴西太守馬援擊卻
之降者萬餘人隴道肅清援職總大體馭衆寬紓賓
客故人日滿其門隴右安之

章帝元和二年秋九月燒當羌號吾寇隴西督烽掾
李璋禦之生得號吾先是號吾與迷吾約同反號吾
先至迷吾失勢遁璋得號吾將謁郡號吾曰獨殺我
無損於羌誠得生歸必有以報隴西太守張紆放之
羌遂服帖

章和元年夏六月護羌校尉傅育誘間諸羌爲迷唐
所殺張紆伐之獲迷吾唐遂據大小榆谷以叛
安帝永初元年六月諸羌復叛斷隴道十二月詔將
軍鄧騭征羌屯漢陽

二年春正月驚擊鍾羌大敗之

元初二年春南安石門羌酋號多等掠漢中斷隴道校尉侯霸與戰敗之冬虞詡攻羌衆於赤亭大破之詡兵少增竈示強羌畏而遁斬獲甚多

獻帝建安十八年春二月漢丞相亮伐魏攻祁山天水南安安定皆應秋八月馬超攻隴上諸郡縣取之獨冀城固守不下

冀城陷超殺刺史韋康及令陳嘉康待救不至窮蹙開門迎超超殺之涼州叅軍楊阜與趙昂姜叙謀禦

超誘超出城殺其妻子昂約城中掾安定梁寬南安趙衢爲內應衢計誘超出城殺其家復閉城固守超進退失據遂襲歷城殺姜叙母楊氏楊阜救歷城超敗奔張魯封阜關內侯叙討超之功侯者十一人後主建興六年春丞相亮伐魏戰於街亭敗績貶右將軍

七年伐魏拔武都復拜丞相

十二年丞相亮伐魏圍祁山以木牛流馬運糧進軍洮水魏司馬懿率師邽城相拒彌月久雨亮引還

延熙十年秋七月姜維復帥眾出祁山後從董亭趨南安與魏將鄧艾戰於段谷維敗績初維與鎮西將軍胡濟期會上邽濟失期不至故敗死者甚眾士卒星散蜀人由是怨維

炎興元年魏征西將軍鄧艾襲漢姜維敗還劔閣艾進至陰平遂入蜀艾先期雍州刺史諸葛緒自祁山趨武都絕維歸路天水太守王頎隴西太守牽鴻夾攻維遂敗

晉惠帝永熙元年庚戌襄武復見大人身長三丈餘

白幘黃衫大呼今當太平

永康六年冬十二月略陽氏人楊茂搜據仇池初略陽清水氏楊駒始居仇池至其孫千萬附魏封為百頃王千萬孫飛龍浸強盛徙居略陽自號輔國將軍右賢王以其甥令狐茂搜為子冒姓楊好賢接士關中士人避難者多依之

懷帝永嘉四年秋七月陽臨渭氏酋蒲洪驍勇群氏畏之漢拜平遠將軍不受自稱秦州刺史略陽公枹罕令嚴更妓產一龍一蛇一鵝

古今圖書集成
五年晉南陽王模表其世子保鎮上邽秦州刺史裴
苞拒之模使都尉陳安攻苞苞奔安定保遂據秦州
六年南安赤亭羌酋姚弋仲東徙扶風自稱扶風公
隨者萬數遂爲後秦

元帝永昌元年春三月張茂使將軍韓璞取隴西南
安之地置秦州南安王保旣死陳安不能守故取之
成帝咸和元年冬十月涼州牧張駿徙隴西南安民
二千餘家於姑臧

四年秋八月趙南陽王蔭帥衆數萬自上邽趣長安
隴東戎夏皆應

孝武帝寧康元年冬十一月秦以王統爲南秦州刺
史鎮仇池下辨故道皆隸之未幾又移治武都是月
秦苻登稱帝於南安徙秦州三萬戶於長安先是徙
隴西三萬戶又徙秦州三萬戶欲都長安也

四年冬十二月楊難敵號右賢王屯下辨楊堅頭號
左賢王屯河池其年茂搜卒二子分王其地

大元十八年後秦隴西公碩德伐西秦入南安硤秦
王乾歸整師隴西以禦之南安硤在隴西東四十里

卽沙灣

安帝隆安元年丁酉武都郡前水中有白龍昇天
晉書姚泓載紀仇池公楊盛攻陷祁山執建節王總
遂逼秦州泓遣後將軍姚平救之盛引退姚嵩與平
追盛及於竹嶺姚讚率隴西太守姚秦都略陽太守
王煥以禁兵赴之讚至清水嵩爲盛所敗嵩及秦都
王煥皆戰死讚至秦州退還仇池先是天水冀縣石
鼓鳴聲聞數百里野雉皆雊秦州地震者三十二殷
殷有聲者八山崩舍壞咸以爲不祥及嵩將出羣僚

固諫止之嵩曰若有不祥此乃命也安所逃乎遂及
於難識者以爲秦州泓之故鄉將滅之徵也

府志南宋文帝元嘉九年秋七月流民許穆之變姓
名司馬飛龍逐陰平太守據其地歸楊難當

南齊書氏楊氏傳氏與苻氏同出略陽漢世居
仇池地號百頃建安中有百頃氏王是也晉世有楊
茂搜後轉強盛事見前史仇池四方壁立自然有樓
櫓却敵狀高並數丈有二十二道可攀緣而升東西
二門盤道可七里上有岡阜泉源氏於上平地立宮

古今圖書集成
室菓園倉庫無貴賤皆爲板屋土牆所治處名洛谷
通志北魏高祖太和十七年冬十一月秦州民王廣
起兵執刺史劉藻秦雍七州皆響震

正光二年秦州氏反詔河間王琛爲行臺以討之
孝昌三年天水民呂伯度據顯親以拒折莫念生尋
歸秦以爲大都督

永熙三年夏秦州刺史宇文泰引兵上隴討侯莫陳
悅悅退保上邽

魏書楊播傳播弟椿爲太僕卿秦州羌呂苟兒涇州

屠各陳瞻等聚衆反詔椿爲別將隸安西將軍元麗
討之賊入隴守蹊自固或謀伏兵山徑斷其出入待
糧盡而攻之或云斬除山木縱火焚之然後進討椿
曰並非計也此本規盜非有經略自王師一至無戰
不摧所以深竄者正避死耳今宜勒三軍勿更侵掠
賊必謂我見險不前心輕我軍然後掩其不備可一
舉而平矣乃緩師不進賊果出掠乃以軍中驢馬餌
之不加討逐如是多日陰簡精卒銜枚夜襲斬瞻傳
首

通志陳後主至德元年夏四月吐谷渾寇隋臨洮疊二州文州總管梁元擊走之

隋文帝開皇十九年秋八月黨項寇會州詔發隴西兵討降之

恭帝義寧元年夏四月隴右盜起金城校尉薛舉起兵隴西自稱西秦霸王盜四起金城刺史郝瑗募兵數千付舉討之舉因劫瑗發兵囚郡縣官發倉賑饑民招撫羣盜至十三萬人盡有隴秦之地薛舉自稱秦帝將兵攻天水克之遂自金城徙都之

隋書豆盧勣傳勣爲渭州刺史甚有惠政德澤流行大致祥瑞鳥鼠山俗呼爲高武隴其下渭水所出其山絕壁千尋由來乏水諸羌苦之勣馬足所踐忽飛泉湧出有白鳥翔至廳前孔子而去又白狼見於襄武民爲之謠曰我有丹陽山出玉漿濟我民夷神鳥來翔百姓因號其泉爲玉漿泉

通志唐元宗開元二年八月吐蕃寇隴西詔隴右道發諸團兵萬人集會州朔方兵萬人集臨洮禦之肅宗至德元載秋八月帝入蜀避兵經河池斜谷避

祿山之亂也法駕不嚴從官或徒步多相失商賈共
途上聞雨淋鈴爲製曲道路咨嗟

代宗廣德元年冬十月吐蕃入寇大震關西陷岷秦
成渭等州盡取河隍隴右之地唐自武德以來開拓
邊境直建西域皆置州縣以都督總管統之軍城障
戍萬里相望祿山之亂精銳入衛留兵單弱羌戎橫
驚各郡邑相繼淪沒

唐書馬燧傳燧爲隴州刺史西山直吐蕃其上有通
道虜常所出入者燧聚石種樹障之設二門爲譙櫓

八日而畢虜不能暴

元載傳初四鎮北度行營節度使寄治涇州大曆八
年吐蕃寇邠寧議者謂三輔以西無襟帶之固而涇
州散地不足守載嘗在西州具知河西隴右要領乃
言於帝曰國家西境極於潘原吐蕃防戍乃在摧沙
堡而原州界其間草薦水甘舊壘存焉比吐蕃毀夷
垣墉棄不居其右則監牧故地巨塹長壕重複深固
原州雖早霜不可藝而平涼在其東獨耕一縣可以
足食請徙京西軍戍原州乘間築作二旬可訖貯粟

古今圖書集成
一歲戎人夏牧青海上羽書比至則我功集矣徙子儀大軍在涇以爲根本分兵守石門木峽隴山之關北抵於河皆連山峻險寇不可越稍置鳴沙縣安豐軍爲之羽翼北帶靈武五城爲之形勢然後舉隴右之地以至安西是謂斷西戎脛朝廷高枕矣因圖上地形使吏間入原州度水泉計徒庸車乘畚鍤之器悉具而田神功沮短其議乃曰興師料敵老將所難陛下信一書生言舉固從之誤矣帝由是疑不決通志興元元年八月以李晟爲隴右節度使進爵西

平王晟以鄉里辭不允

建中四年隴右節度使張鎰與吐蕃尚結贊盟於清水文曰今國家所守界涇州西至彈箏峽西口隴川西至清水縣鳳州西至同谷縣東爲漢界番國守備在蘭渭隴會秦冀東至成州南抵劍南西界大渡水之東於是隴右盡失

貞元三年尚結贊遣使求和贊戍監夏州糧運不繼聞李晟馬燧渾瑊等兵至大懼故有此請撤清水戍歸侵地盟於原州

古今圖書集成
宣宗大中元年鳳翔節度使崔珙破吐蕃克清水遂
敗秦州清水先隸秦州以本州未復權隸鳳翔至是
仍舊

穆宗長慶元年辛丑隴上有黑獸似猴而腰尾皆長
性猛迅專捕食蕃人遇漢人不食

懿宗咸通四年置天雄軍於秦州以左金吾將軍王
彥寔爲天雄軍節度觀察使以成階西禮隴渭隸焉
後梁均王貞明四年春二月蜀主命招討副使王全
昱殺天雄節度使唐文裔於秦州以王承休代之殺

文裔惡專命也蜀主先使文裔出秦州伐岐岐遁文
裔自爲秦州故殺之若承休之代則其妻乞之也

後晉高祖天福三年西川節度使王建攻秦隴乘李
茂貞之弱也

宋史吳延祚傳延祚爲東京畱守建隆三年夏帝謂
之曰卿掌樞務有年於茲與卿秦州以均勞逸明日
制出恐卿以離朕左右爲憂故先告卿卽以爲雄武
軍節度先是秦州夕陽鎮西北接大藪多材植古伏
羌縣之地高防知州日建議就置采造務調軍卒分

番取其材以給京師西夏酋長尚波千率眾爭奪頗傷役卒防捕繫其黨以狀聞上令延祚代防賚詔赦尚波千等夏人感悅是年秋以伏羌地來獻

溫仲舒傳淳化二年拜右諫議大夫樞密副使改同知樞密院事四年罷知秦州先是俗雜羌戎有兩馬家朶藏梟波等部唐末以來居於渭河之南大洛小洛門岩多產良木為其所據歲調卒采伐給京師必以資假道於羌戶然不免攘奪甚至殺掠為平民患仲舒至部兵歷按諸岩諭其酋以威信諸郡獻地內

屬既而悉徙其部落於渭北立堡砦以限之民感其惠為畫像祠之會有言仲舒生事者上謂近臣曰仲舒嘗總機密之職在吾左右當以綏懷為務古者伊洛之間尚有羌渾雜居況此羌部內屬素居渭南土著已久一旦擅意斥逐或至騷動又煩吾關右之民及命知鳳翔薛惟易與仲舒對易其任連知興元江陵二府加給事中會內侍藍繼宗使秦州還言得地甚利乃召仲舒拜戶部侍郎尋叅知政事二砦後為內地歲獲巨木之利

鄭戩傳戩知永興軍初靜邊砦主劉滬謀築水洛結公二城以通秦渭援兵招生羌大王族爲邊衛戩使滬與著作佐郎董士廉督其役會罷戩四路安撫使韓琦知渭州尹洙皆以爲不便召滬士廉罷役歸不聽乃使裨將狄青將兵以往械送德順軍獄戩力爭於朝卒城之

藍繼宗傳秦州並邊有大小洛門砦自唐末陷西羌雍熙中溫仲舒論酋豪使獻其地徙衆渭北言者以爲生事請罷仲舒太宗遣繼宗往按視還奏砦據要

害產良木不可棄帝悅復使繼宗勞賜仲舒

通志真宗祥符九年秋八月知秦州曹瑋敗吐蕃於伏羌瑋任秦州屢請益兵宰相李迪曰瑋知唃廝囉欲窺關中欲益兵爲備非怯也詔發關中羨兵赴瑋瑋勒兵大破之斬首千餘級唃廝囉走保谷中不出仁宗慶曆元年元昊寇渭州任福敗績貶韓琦知秦州冬十月分陝西爲西路以韓琦知秦州兼秦鳳路經略安撫使自元昊敗關中大震乃有此舉
宋史劉敞傳敞權度支判官徙三司使秦州與羌人

古今圖書集成
爭古渭地仁宗問敞棄守孰便敞曰若新城可以蔽秦州長無羌人之虞傾國守焉可也或地形險利賊乘之以擾我邊鄙傾國爭焉可也今何所重輕而殫財困民損士卒之命以規小利使曲在中國非計也議者多不同秦州自是多事矣

馬知節傳知節知秦州州嘗質羌酋支屬餘二十人踰二紀矣知節曰羌亦人爾豈不懷歸悉遣之羌人感之訖終更不犯塞時州有銀坑歲久礦竭課額弗除主吏破產償之不足知節請蠲之章三上乃允遷

西上閣門使

范祥傳祥提舉陝西銀銅坑冶權轉運副使古渭州距秦州三百里道經啞兒峽邊城數請城之朝廷以餽餉之艱不許祥權領州事驟請修築未報輒自興役蕃部驚擾青唐族羌攻破廣吳嶺堡圍啞兒峽砦官軍戰死者千餘人坐削官

王素傳素知渭州坐市木河東有擾民狀降華州治平初夏人寇靜邊砦召拜端明殿學士復知渭州於是三鎮涇原蕃夷故老皆歡賀比至敵解去拓渭西

南城濬隍三周積粟支十年屬羌奉土地來獻悉增募弓箭手行陳出入之法身自督訓其居舊穿土爲室寇至老幼多焚死爲築八堡使居之其衆領於兩巡檢人莫得自便素曰是豈募民兵意邪聽散耕田里有警則聚故士氣感奮精悍他道莫及

傅求傳求爲戶部副使隴右番酋蘭氈獻古渭州地秦州范祥納之請繕城屯兵又括熟戶田諸羌斬之相率叛夏人欲得渭地又移文來索後帥張昇以祥貪利生事請棄之詔求往視求以爲城已訖役且已

得而棄非所以強國威乃詔諭羌衆反其田報夏人以渭非其有不應索正其封疆而還兵遂解

馬仲甫傳仲甫知瀛州秦州古渭介有唐之南夏人在其北中通一徑小警則路絕仲甫得筆粟城故址自鷄川砦築堡北抵南谷環數百里爲內地詔賜名甘谷堡故時羌人入城貿易皆僦邸仲甫設館處之陽示禮厚實閉之也

通志神宗熙寧二年冬十月秦州刺史王韶乞治秦州閒田許之貶秦鳳經略使李師中知舒州師中言

古今圖書集成
韶所指乃極邊弓箭手地耳又將移市易司于古渭
恐秦州自此益多事得不補失不便韶附王安石故
主韶議削師中職遣李若愚按實止得地一頃又爲
謫知州竇舜卿以韓縝知秦州

五年八月升古渭砦爲通遠軍以根本隴右以王韶
知軍事知秦州郭逵發韶盜庫錢徙逵涇州

六年夏五月以通遠軍隸熙河路雖置熙河路然河
洮岷三州猶未復

元符二年秋八月初城會州元豐中陷於夏人至是

始復以安西城北六砦隸之

哲宗元祐二年秋八月吐蕃阿里骨誘鬼章據洮以
叛州將种諤執之于京師

徽宗崇寧三年秋八月疊州番落來降陞通遠軍爲
鞏州以處之秦鳳招納司言洮階生番納土得邦番
疊三州詔本路經略胡宗回加樞密直學士

高宗紹興元年夏六月張浚表吳玠爲陝西諸路都
統制時關隴六路盡陷于金所餘階成岷鳳洮五州
及鳳翔之和尚原與方山原而已冬十二月經略使

古今圖書集成
關師古復熙鞏先王彥敗劉豫所遣將郭振于白石
鎮復秦州振益兵再至遇于鷄川復大敗追至打狼
川遂斬首二千級各郡皆來應遂復熙鞏隴人差爲
吐氣

三年春正月金人克饒風關吳玠走西縣劉子羽聞
秦鞏復陷亟命守關而召吳玠玠自河池日夜馳三
百里至關金人悉力夾攻六晝夜死者山積敵乃更
募死士間道出玠後乘高瞰關諸軍不支遂潰
四年夏四月安撫使關師古以洮岷叛

五年春二月吳璘復秦州金撤離喝來爭楊政敗之
安遠川吳玠聞敵犯淮南遣吳璘楊政乘機牽制璘
等出奇兵自成州至秦拔其城撤離喝集諸道兵來
援政迎擊敗之

九年春二月詔階成等州悉聽吳玠節制遣內侍齎
詔就其家付之至則玠病甚扶掖受命

十一年秋九月吳璘再復秦州奉詔班師自秦州復
陷璘日夜嘗膽謀復之聞金將胡蓋屯劉家圈往攻
之以壘陣法更迭力戰士卒死鬪金兵大敗降者數

古今圖書集成
千人盡走保臘家城璘圍而攻之城垂破詔班師璘
卽還河池政還鞏金復陷秦州

寧宗嘉定元年夏六月和議成金人來歸秦隴地
十一年春二月金烏古論長壽取西和州

理宗寶慶三年冬十二月蒙古入西和州知州陳寅
死之蒙古兵薄西河城寅率民兵日夜苦戰援兵不
至城遂陷寅謂妻杜氏曰若速自爲計杜曰安有生
同君祿死不共王事者卽飲藥自殺二子及婦俱死
母傍寅聚而焚之伏劍而死一家同死者二十八人

紹定五年金以汪世顯爲鞏昌便宜都總帥以抗蒙
古初世顯以戰功爲征行總帥分治陝西西路時調
度窘迫世顯發家資率豪右助邊鄰郡效之軍餉遂
足

端平二年冬十月金鞏昌總帥汪世顯降于蒙古命
仍其職金亡郡縣皆降獨世顯堅守不下聞百姓欲
獻城者乃謂其衆曰吾何愛一死念若曹何罪橫羅
兵鋒及蒙古太子闊端至城下世顯迎降太子曰吾
奉命征討所至皆下汝獨固守何也對曰有君在上

賣國市恩之人諒所不取太子喜命仍其職
度宗咸淳九年冬十一月元以其子忙阿刺爲安西
王開府鞏昌路鎮秦隴涼蜀之地

金史張中彥傳中彥爲秦鳳經略使秦州當要衝而
城不可守中彥徙治北山因險爲壘今秦州是也築
臘家諸城以扼蜀道帥秦凡十年改涇原路經略使
通志元仁宗延祐二年乙卯成紀縣夜雷電北山一
峯南移至藉河川平地突出土阜高四丈
順帝至正十三年癸巳會寧地震公廡牆圯得弩五

百張皆長丈餘人莫能挽

明太祖洪武二年夏四月大將軍徐達進兵隴右鞏
昌元守將總帥汪庸歸附達遣平羌將軍馮勝取鞏
勝駐兵城東烽火臺守臣開門迎王師達令嚴肅秋
毫無犯居民安堵秋七月遣將來伐南境秦徽階岷
西禮成文北境安會渭秦俱歸附列郡聞鞏郡已降
民不擾各思歸附達各留兵守其地

三年夏平章丁世貞會土番攻文州守將朱顯忠死
之攻城四十日援兵不至部下皆曰與其陷死地孰

古今圖書集成
若出城求生路乎顯忠厲聲曰爲將守城城存與存
城亡與亡豈有求活將軍耶忠知下有攜心獨領家
兵二百人突圍力戰死于陣死三日救至

四年征西將軍馮勝副將軍傅友德陳德出隴西攻
下甘肅河西平

五年夏四月鄧愈沐英等征西番分兵爲三路併力
齊入番部抵川藏覆其巢西至崑崙山斬首八千級
俘男女一萬名口馬五千牛羊十三萬番人震懾願
求內附封其酋僧爲法王佛子隨俗以神道設教後

更馭以茶馬番遂受羈

十一年春二月曹國公李景隆率師建岷州衛于祐
川

十二年秋七月西平侯沐英率師建洮州衛于洮州
十三年開設文縣守禦千戶所土官趙遠聚集土民
爲軍隸陝西都司

十五年改隸秦州衛

十八年裁革文縣以千戶領縣事

二十七年千戶張嘉據火燒關斷臨江橋以叛命平

羌將軍審政討平之先是嘉得龍馬于古教場心自負妖人霍佛奴謂嘉有天命遂叛政兵至連戰大敗軍皆降嘉竄入林搜得誅之

英宗天順二年設靖遠衛于舊會州舊會州原在河上元移會州于西寧城空其地明初惟建巡司己巳之變遂改巡司設衛名靖遠從都御史陳鎰總兵鄭名之請也

六年復設文縣自武弁領民社橫肆侵蠹百姓苦之士民尹志凱列其狀撫按會題故復設之所仍舊

憲宗成化四年置洮岷邊備以飭兵馭將防制番戎以洮岷階固徽成文和分隸之

十年甲午靖遠大寒河冰凍結有異獸狀若黑驢衝冰而下冰皆自開至城北入漩今名其處曰黑驢漩武宗正德七年蜀盜攻陷徽州城邑焚掠殆盡是時徽無城郭又人不知兵故遭其慘分巡僉事李璋招撫散民併道屬衛卒始議修築

十五年八月西固番侵掠階成總制尚書王瑗遣鎮守劉文帥師問罪破其八族受降而還斬首前後三

百級願奉約易馬者三十六族與訂盟

八年夏六月蜀盜復至徽州南鄙按察僉事李璋率衛兵迎擊破之盜扭前得志輕敵又值有備故敗斬首五十八級男婦自投歸者數百人州民爲立生祠十六年設臨鞏兵備道駐蘭州飭兵勵將

世宗嘉靖四年隴東流賊百餘攻秦安邑令張繼先督民兵二百人戰于束龍谷執其魁餘散去

五年賊復至三百餘人據秦州桃花山四劫知州王卿都指揮尹謨討平之

十三年春正月回賊馬興鳩衆千餘人據階州鐵爐山以叛殺千戶王靈鳳秋八月套部入犯自秋歷冬掠安定會寧通渭三縣徽州夜大雷街民有執火炬者忽奪去擲城北樓

十四年夏五月賊興再犯徽成殺指揮王煦秋七月巡撫都御史黃臣親督大兵討平之黃聞煦被殺大怒督叅政陳時明分巡僉事紀常叅將崔嵩韓選白浹指揮种繼勳率大軍遇于石門大戰破之靈鳳子印身先士卒射死興于陣手斬之人心大快撫道旌

賞仍薦于朝會寧大雷擊死棄瞽父者肌肉焦爛衣服不損

三十七年戊午隴西北境黑氣撲人有物如狸輒殺人時謂黑眚旬月始息

神宗萬曆二年夏四月番亂力哱犯階州執守備范延武守備被執番以刀挾之令跪守備不跪炙以火守備大罵番懼留之

四年分守隴右道參議李維禎城鞏昌北郭鞏郡居民住北郭者倍于城居先是套部入犯再至安會之

郊郡城戒嚴又城中無水禎慮之屬有沿邊修補城郭之命禎毅然曰予志也遂剗拓新基恢擴舊址嚴立告戒身自督查期年工完高深視大城倍之巖巖奕奕足壯金湯

四年春三月分守叅議劉伯燮副總兵孫國臣興師問罪得亂力哱誅之大軍以正月至階番入林榨路口兵不得交相持月餘計無所施哱忽遣番狀謝罪請降歸國臣議曰師老矣姑因之與和約給賞南門入西門出殺六十五人番始覺遁執哱殺之梟其首

古今圖書集成
于番界

十八年海部大舉入寇逾臨洮掠渭源游騎至郡西
焦家鋪城中戒嚴總兵劉承嗣參將鄧鳳遊擊孟孝
臣郭有先四將兵戰于朱家山敗績敵遂深入殺擄
甚慘秋九月川部犯舊洮州兵備右叅政畢自嚴督
同副將李國柱提兵躬禦却之兩川中皆番帳偵探
不能遠又烽火失傳以夜半猝至故戍卒近番頗罹
其害嚴聞警馳至而副總兵李國柱率洮州兵亦至
相持數日以大將軍砲擊之始遁去

四十八年秋七月海川二部犯洮岷守道張士俊聞
警馳赴督兵將禦却之八月鞏郡守劉文琦修理城
郭分督守禦以備警

熹宗天啓元年辛酉牛生二麟麕身馬足其唇甚丹
鄉民以爲怪而棄之邑令俾葬城南道左建碑爲麒
麟塚

七年丁卯有五色祥氣見于龜山之麓自未及申而
散

懷宗崇禎四年辛未二月通渭縣己丑夜龍現火光

古今圖書集成
自南而北

六年癸酉冬十二月西和地震城梁盡塌房屋半頽
壓死邑民王子孟講等三十餘人

七年甲戌二月文縣連雨至三月朔日色忽變綠黃
如薄蝕狀暝霾昏黑咫尺之間彼此不相識是年五
月初三日流寇至臨江驛守備張外勳斷橋拒之賊
竊渡上流勳戰死賊乘勝驅進官署民居俱成灰燼
八月流賊寇掠通渭縣形勢將危忽西北雲端有白
氣如偃月形色邑人皆禱之關帝賊遂遁去

十二年己卯六月通渭縣雨雹害稼

十三年庚辰通渭西河伏羌會寧禮縣自春至夏不
雨民饑相食死者塞道

十四年辛巳四月二十七日文縣地震最甚六月寧
遠大旱人民饑死多半通渭大雨雹飛蝗蔽日

鞏昌府部雜錄

聞見錄舊說武都紫泥用封壘故詔有紫泥之名今階州故武都也山水皆赤爲泥正紫色然泥安能作封當是用爲印色耳又說武都爲武王采地文成康三州亦三王采地也皆因以得名雖無經見其傳亦古矣

秦州伏羌城三都谷有曹瑋武穆與羌酋李遵戰勝之地羌人到今畏懾不敢耕草木彌望武穆以六月二十日生邦人遇其日大作樂祭于其廟云

鞏昌府部外編

通志李知禮隴西人少趨捷善射能騎乘兼工彈丸所殺甚多捕魚不可勝數貞觀十九年病數日卽死乃見一鬼牽馬一匹大于俗間所乘之馬謂知禮曰閻羅王追公乃令知禮乘馬須臾之間至王前王約束云遣汝討賊必不得敗敗卽殺汝有同侶二十四人向東北望賊不見邊際天地盡昏埃下如雨知禮等敗知禮謂同行曰王教嚴重寧向前死不可敗歸知禮回馬射三箭諸賊稍退却箭五發賊遂敗散事

畢謁王王遂釋放凡經三日忽向西北出行入一牆院見飛禽走獸可滿三四畝來索命漸相逼近曾射死一牝犬直向前嚙其面次及身體無不被傷復見三大鬼各長丈餘共剝知禮皮肉分給禽獸其肉剝而復生生而復剝如此三日苦毒之甚不可勝紀事畢知禮回顧不見一物遂踰牆南走莫知所之復有一鬼逐及知禮乃以鐵籠罩之有無數魚競來啖食食畢鬼遂去魚亦不見其家舊供養一僧其僧先死來與知禮去籠語知禮曰檀越大饑授以白物三九

如棗令知禮噉之應時而飽乃云檀越宜還家僧亦別去知禮所居宅北見一大坑其中有諸槍稍攢植不可得過見其兄女并婢齋箱箱內有錢絹及飲食在坑東北知禮心中謂此婢及姪女遊戲意甚怪之回首北望卽見一鬼挺劍直進知禮惶懼委身投坑遂得蘇自初死至於重生凡經六日後問家中乃是姪女持紙錢絹及飯饌爲奠

Blank manuscript page with vertical columns.

